

EU može pomoći građanima BiH da ukloni prepreke za integraciju



Bosna i Hercegovina ima snage da se vrati na put integracija u EU, rekao je visoki predstavnik i specijalni predstavnik EU članovima Evropskog parlamenta u Strasbourgu, naglasivši da će liberalizacija viznog režima dati podsticaj proevropskim snagama u zemlji.

“Građani Bosne i Hercegovine iskreno cijene ulogu koju Evropski parlament ima u borbi za njihova prava da nesmetano putuju Evropom”, rekao je visoki predstavnik i specijalni predstavnik EU tokom današnjeg sastanka sa predsjednikom Evropskog parlamenta Jerzyjem Buzekom.

On je rekao da će liberalizacija viznog režima izgraditi pozitivnu energiju u Bosni i Hercegovini za povratak na evropski put, te izrazio uvjerenje da Evropa sada može pozitivno odgovoriti na pragmatične i efikasne korake koje su poduzeli nadležni organi BiH u pogledu liberalizacije viznog režima.

Izrazio je razočarenje činjenicom da bh. političke stranke prije opštih izbora nisu uspjele postići konsenzus o provedbi odluke Evropskog suda za ljudska prava, kojom se traži da se okonča kršenje osnovnih građanskih prava u Bosni i Hercegovini, uprkos tome što je Evropski parlament uputio jak apel da se ovo pitanje riješi.

Visoki predstavnik i specijalni predstavnik EU rekao je da se prisustvo Evropske unije u zemlji mora restrukturirati kako bi ona mogla efikasnije pomagati građanima da prevaziđu prepreke na koje nailaze na putu integracije i na taj način osigurati da građani Bosne i Hercegovine što prije budu u prilici iskoristiti prednosti članstva u EU.